

Pinochet auzia

Ahobatez, Augusto Pinocheten estradizioa bidezkoa dela berretsi dute lau estatuek

Osasun azterketa berri bat egiteko eskatu diote Jack Straw Barne ministroari

Erredakzioa / Donostia

Augusto Pinocheten estradizioa eskatu diote berriro **Pinochet kasuan** sartuta dauden lau estatuek Jack Straw Barne ministro britainiarrari. Bide batez, diktadore ohiari osasun azterketa berria egin diezaiotela eskatu dute, Erresuma Batuari aurkeztu dizkion alegazioetan.

PINOCHETEN estradizioa eskatu zuten lau estatuek — Espainiak, Frantziak, Suitzak eta Belgikak — berriro haren estradizioa eskatu zioten atzo Erresuma Batuko Barne ministro Jack Strawi, lau sendagileek diktadore ohiari egin zizkion osasun azterketak ikusi ondoren.

Hiru epailez osaturiko Londresko auzitegi batek otsailaren 15ean erabaki zuen Pinocheten osasunari buruzko txostena ikusteko eskubidea zutela lau estatuek. Txostena lau mediku britainiarrek egin zuten. Bertan, Pinochet ezin zela estraditatu zioten, haren osasun kaxkarra zela medio.

Txostena aztertu ondoren, atzo amaitu zitzairen Belgika, Frantzia, Espainia eta Suitzari alegazioak aurkezteko epea. Estradizioa berriro eskatzeaz gain, beste azterketa mediku bat egin diezaiotela galdegin zioten Strawi.

Baltasar Garzon Espainiako Entzutegi Nazionalako epaileak auto batean adierazi zuenez, Pinocheten osasunari buruz Espainiako sendagi-



Pinocheten kontrako kontzentrazioa Londresko Gorte Gorenen aurrean.

leek egin duten txostenen arabera, diktadore ohiak «epaiketa batera joateko gai da». Hori dela eta, Garzonek izendaturiko medikuek beste azterketa egin diezaiotela galdegin zuen autoan.

Frantziako Atzerri Ministerioaren bozeramaile Anne Gazeau-Secretrek berretsi zuenez, Le Loire epaileak hiru aditu izendatu zituen Pinochet aztertzeko.

Erreguzko batzordea

Belgikak ere beste osasun

azterketa bat eta erreguzko batzorde bat eskatu dizkio Londresi. Estatu horren ustez, Belgikara estraditatu eta han epaitua izateko gai da Pinochet.

Horrez gain, Suitzaren arabera, Estradizioaren Europako Hitzarmenak dio estradizioa ezin dela oztopatu osasun arazoengatik. Poliziaren Bulego Federalaren bozeramaile Folco Galiren ustez, Londresko osasun azterketak ez dio Suitzari «funtsezko elementu berriak ematen».

Horrez gain, Bernard Ber-

tossa Genevako fiskala pozik azaldu zen Suitzak estradizio eskaerari eutsi diolako. Bertossak esan zuen berak ez zuela inoiz «zalantzan jarri» Suitzako agintarien azken erabakia hori izango zenik.

Bestalde, Strawren ebazpena ez errekurrizteko Abel Matutesek hartutako erabakia «oinarri arrazoituak» dituela esan zuen atzo Espainiako Auzitegi Gorenak. Hala, Marcos Roitman eta Carlos de Miguel irakasleek Matutesen kontra jarritako kereila atzera bota zuen.

Martxoaren 18ko hauteskundeetan eragin nahi izana egotzi dio Taiwanek Txinari

■ **Taibeik bere** «independentzia» berretsi du Pekinek bat-egitea negoziatzeko eginiko eskaerari erantzunez

Erredakzioa / Donostia

DATORREN martxoaren 18ko lehendakartzarako hauteskundeetan eragiteko asmoa duela egotzi dio Taiwanek Txinaren bat-egitea negoziatzeko eskaerari.

Ildo horretatik, *Taipei Times* egunkariaren atzoko editorialak adierazten zuenez, Txinaren birbartzeko eskaerak ez du aparteko aldaketarik plazaratu, eta, horrek erakusten duenez, «Pekinek lehendakartzarako hauteskundearen agenda kontrolatu nahi du».

Txinaren birbartzeko eskaerak Taiwango independentzia berresten duten erreakzioak sortu ditu. Esate baterako, Txina Kontinentaleko Gaietan Batzordeko Taiwan go ordezkari Lin Chong-pin-ek atzo esan zuenez, «Txinak errealista izan behar du eta bien arteko bereizketa onartu behar du. Taiwani utzi egin behar dio Txina bakar baten printzipioa beren modura interpretatzen, Pekinen menpeko probintzia gobernua bihurtu gabe».

Taiwango Atzerri Ministerioak, berriz, Taiwanek harreman diplomatikoak izateko duen eskubidea defendatu zuen, «subiranotasuna duen nazioa baita».

laburrean

I R A N

■ Legebiltzarreko lehendakariaren ustez, «Errepublika Islamikoa garaile atera da» hauteskundeetan

ALI AKBAR NATEQ NURI Legebiltzarreko lehendakariak atzo adierazi zuenez, «Errepublika Islamikoa garaile atera da» hauteskundeetan. Kontserbadoreak nagusi dira Legebiltzarrean egun. Era berean, Nurik «lasai» egoteko eskatu zien kontserbadoreei. «Pozik izan behar dugu herriaren parte-hartze handiagatik. Gure erregimen islamikoarentzat garaipena da. Kontserbadoreen porrotaz hitz egitean Nurik esan zuenez, «Khatami lehendakaria babestu duten egunka-

riek orain lasaitasuna eta elkartasuna aldarrikatu behar dute kontserbadoreen artean».

S O M A L I A

■ Agintariak 700 gorpu aurkitu dituzte hobi komun batean

SOMALIAKO agintariak 700dik gora gorpu aurkitu zituzten hobi komun batean, Betberako aireportutik gertu, Somaliako iparraldean. Siad Barre lehendakariaren Armadak egindako sarraskia izan daitekeela uste dute NBeko iturriek. Litekeena da 1988an desagertu ziren klan bateko kideenak izatea gorpu horiek. Lehendakariak hilak boterea galdu zuen 1991. urtean.

M O Z A N B I K E

■ Alerta egoera ezarri dute, zikloi bat irits daitekeelakoan

AGINTARIEK alerta egoera ezarri zuten atzo Mozambiken, bi asteko uholdeen ondoren, zikloi bat irits daitekeelakoan. Euriteen ondorioz etxebizitzarik gabe gelditu diren milaka pertsonen egoera oker lezake Eline zikloiak. Haize bortitza Madagaskartik dator (Ozeano Indikoa), eta, eguraldiaren prebisioren arabera, Gaza eta Inhambane herrialdeetara doa. Gutxienez 67 pertsona hil dira hilaren hasieratik uholdeen eraginez, eta 500.000 pertsona baldintza eskasetan bizi dira. Bestalde, uholdeen eraginez kalte-

tuak izan diren 300.000 pertsonentzako 30 milioi dolarreko nazioarteko laguntza eskatu du NBek.

I N D I A

■ Bost zibil hil dira Pakistango Armadak Kaxmirren egindako erasoan

BOST zibil hil dira azken egunotan Kaxmirren, ustez Pakistango Armadak soldadu indioen kontra egindako erasoaren ondorioz. Bonbardaketa astelehenean hasi zen eta atzo amaitu zen. Gutxienez 500 jaurtigai erori ziren Tangdhar, Dani, Nogabra eta Naxiaan herrietan. Kaxmirren Indiako Armadak eta Pakistango tropen artean izandako azken biktimak dira.